



O Volapükaf lens valöpo!

In nüm at dil lätik koneda bida: mär < fa jiel ‚Anna van Steenbergen‘ papübon. Lautanagität kösömo neleton notükami vödemas (igo as tradutods) fa lautans nutimik, e fredükos, das literat Volapükik paläfulükon dub penäds attimik. Atos bo binon i reklam vobedik, bi nemödikans kanons pleidülön demü tradut lautotas oksik ini Volapük. Kisi cedol-li dö somikos? o ‚Stephen King‘! Mödikumos dö vobots jilautana pemäniotöl panunon pö pads bevüresodik sököl: ‚<https://www.facebook.com/everbeatingchronicles>‘, ‚<https://www.goodreads.com/author/show/21114177.AnnavanSteenbergen>‘, ‚<https://www.amazon.com/stores/Anna-van-Steenbergen/author/B0BTXJ5R73>‘.

Ün tumyel degzülid nolavans, vobans fiamas bevünetik, törans mu pato ädrimälons dö pük kobädik; datikans yufapükas id ädemons dinädi at. Klu mekavapüks vönädik no ebüojonidons ad literat muadik. Flagons viti notodamoda difaplänovik, sinifas nevoik pö geb vödas, sevabo viti utosa, kelos suvo komädon pö vobod literatavik e kosäd aldelik komunanas. Sis lunüp volapükans ye äprimons ad tradutön konedis e poedotis ini pükasits okas; igo äspelons, das fütüro lautot nulik alik pöpübon in pük lönik lautana äd in valemüpük fa valans pösevöl, dub kelos kuliv kobädik menefa ödavedon. Vönaoloveikod ebo at eklülädon binön dulöfik, e nu yufapükasits mödadilo pagebons as medöms traduta lekanik. Ön tef at Volapük i labon fütüri gloriik.

Vipom oles reidedi nitedik redakan:

Данил Морозов

V:42:2023

JIGAM DRAKA.

fa ,Anna van Steenbergen', 2008
petradutöl fa ,Jan van Steenbergen'.

Dil telid.

Jiplin: ,Su-Zan' jenöfo no ädesinof mati. Bü lunüp ya isludof, das öbinof hipul. Äklotof oki manöfiko, ädekötof heris jönik ä dofikis oka, ämonitof su jevod in fot, ed äjütof me car. Ab äbinof jipul jönikün in län lölik. Posä ilelilof dö flag draka, ävutikof.

„Kio mähpüdik!” äknirof me tuts pärlatasümik. „Atosi omibläfob ome!”

Ven polastul ofik ästopon fo lekev ela ,Pif-Paf', eli ,Su-Zan' ya ästebedom nitedälan it, piklotöl in kimonod sadinik gudikün oka. Sunädo ävoätükons omi logs lejönik ofa fomü mügdals, bi nek in Tsyinän älabon logis somik. Ävüdom jipuli vimik ninio ed älofom ofe legivoti.

„No vilob bijutis!”, ,Su-Zan' äprotestof. „Ni vilob klotedis jerik.”

„Pif-Paf' däsperiko ädeädom föfalögis kralik oka.

„Kisi üfo kanob-li givön ole? o löfikan oba!”

„Su-Zan' ävilof ya büedön omi gesedön ofi lomio, ab tän tiket semik äsüikon in kap ofik.

„Vilob jevodi binü lefog labü giom binü vien, no pluamoviki su glun äsi in lut. E cari binü reinabob, kel jüton lü sol it.”

„Pif-Paf' äkratom kapi skailik oka demü beg so seledik.

„Benö! Ogivob ole jevodi e cari, kelis ebegol.”

Ämoflitom ini lut, kö de lefogs e nolüdavien äfomom jevodi vietik. Poso äsesumom se reinabob tanedis vielik anik, ed äflökom de ons cari.

„Su-Zan' ädafredof e sunädo ävilof blufön legivotis bofik. Äflitons kobiko, e flitölo len jipul piläbüköl, ,Pif-Paf' balidnaedo sis lunüp äprimom ad smililön. Jevodil lefogik äjuton äs tep, e sol sekü dred demü sagits äprimon ad fugön da sil. Äpöjutons oni jü soar, sovüo jüs änübuon ini mel, e pla on mun largentakölik äkomikon.

Ye pos geköm lä lekev äklülädos, das jevod äfesmokon in lut, e car reinabobik äpaelikon ed änelogädikon.

„No favolös! o jiplin! Algödiko ofomob jevodi nulik pro ol äd omekob cari nulik”, ,Pif-Paf' äpromom.

V:43:2023

„Glorö!“, „Su-Zan’ ävokädoḡo fredö. „Gö! o drak! omökob tiedi pro obs.”

„Ekö! jimatan dialik pro ob“, „Pif-Paḡ“ äsludom, ab nog ämutom gevön oke fümi, das väl okik äveräton. Ädugom eli „Su-Zan’ ini divöp okik ed äjonom ofe bogis tufülöl me gold e nobains.

„Labob is bijutis valik in vol sevädölis“, äsagom. „Kanol getön ali, dö kel drimälol. Ab välolös sapiko, bi in div at läb olik kanon peklänedön.”

Nevilöfo „Su-Zan’ älülogof magifotis at. Lomo ägetof suvo legivotis, ab nonik onas äkanon plaädön utosi, kelosi äneodof. Bi äbinof jipul, blod yunikum ofik fütüro övedom reg, e demü atos alans ägivons ome küpäli mödikum ka ofe. Ävilof binön leigiko veütik. Äpidof, das no äbinof hipul, e kludo no ädalabof fomälodi pülikün dö plödakösöm oka.

Süpiko älogof smaliki jänili largentik labü ladil. Äbinon vemo pülik leigodü divs valik, ab äsenälöf, das äbinon nekösömik ä mu digädikün. Äsumof oni ini nam, e täno bos bisarik äjenon. „Binol jipul jönikün ä magifikün in vol lölik“, älihof vögili sekömöl se bijut. „No nedol bitön ko simul äs seiman votik, bi alans levemo löfons oli. Pato fat olik”.

„Su-Zan’ bluvik ägleipof niliki loki in frem goldik ed älogof lü loka= mamagod oka, äsva älogof-la oki balidnaedo ün lifüp.

„Binob jönik“, ävispof.

„Vemo gudiko evälol“, äsagom drak kotenik. „Ai lenlabolös särviga= jänili magivik at, sodas neai oglömol, kio binol plödakösömik. Ven osenof lügi, opedolös oni fimiko, tän lananil belödöl oni osanon ladäli olik.”

„Egivol obe mödikumi, kas ädalob drimön. O drak! obinob jimatan olik. Ab tökü at, oleadol obi fovo reidön bukis, monitön e yagön, e no okoedol obi brodön ni nägön.”

„Baicedö!“, hidrak äyilidom, bi älecedom „suämi” somik gidöfiki pro mat.

Ed ekö! so „Su-Zan’ ävedof jimatan draka. „Pif-Paḡ no plu ämutom drinön tiedi soaliko, e jiplin ivitof lifi in cek goldik. Neai plu ädotof dö ok, e pos tim anik ästopedof ad klotön oki äsä hipul. Aldeliko, ven zedelo mens logedons lü sil, logons jiplini su jevod lefogik yagöli soli kobü drak dugädöl ofi.

Ömna binos so, das noe läb davedikon se löf, abi löf se läb. ■

VOLAPÜKANES DÖ DATIF.

Dil degvelid. *Fa ,Daniil Morozov': vicifal.*

7.2. Sinifs votik.

A. Datif lüoda u mufa. Datif lüoda pemänioton löpikumo, ab komä= dons nesuvo in vödems dasamik. Zeil mufa in Volapük nutimik no dalon pamalön medü subsat in datif. Pla datifs somik natapükas difik daloy ge= bön subsati kobü präpods anik (*lü, äl, igo el ini*). Nitedos, das Volapük rigik no äjinon labön proibis sevärik somik. Mu pato datif äpubon pö värbs ko foyümot: *kos=*. Leigodolsös vödemadiledis sököl!

- *Plu nilikumo äkömoms zeile omsik, plu äbinos ome, äsif büf dedit tefü tim so lonedik ämutomla sagön ofe zesüdikosi bos* („Bienalak“, 1890) / *Plü äkömons nilikumo nilü zeil okas, plü älabom senäli, das ämutom, büä öleditom dü tim so lunik, sagön ofe bosì zesüdik* („Bienalak“, degyel 1950^{id}).
- *änilom vendelabame* („Bienalak“, 1890) / *änilikom nilü soarabam* („Bienalak“, degyel 1950^{id}).
- *natem äjinom vedön fikulik ome, plu nilikum äkömoms yade* („Bienalak“, 1890) / *natemam äjinon vedön fikulikum pö om, plü äkömoms nilikumo lü farm* („Bienalak“, degyel 1950^{id}).
- *Man stümik in lovegun blonik äköskömom tevane* („Bienalak“, 1890) / *Man gravik in plögun braunik äköskömom tevani* („Bienalak“, degyel 1950^{id}).
- *Väp svidik äköskömom ome* („Bienalak“, 1890) / *Benosmel svidik äkos= kömon omi* („Bienalak“, degyel 1950^{id}).
- *Loged mota äsukom ofe* („Bienalak“, 1890) / *Loged mota äsökon ofi* („Bienalak“, degyel 1950^{id}).

Ä. Datif leigoda. In natapüks mödik subsat in datif kanon jäfidön as lim telid leigoda, tefa rezipik, baiäda (värbs patedik: *pötöfön, klotugön, bai= ädön, leigön, ...*). Gebäd somik äbinon mögik in Volapük rigik, ab sinif tefik datifa defon in Volapük nutimik, leigodolsös:

Äsagol sembalna, das sümom lovegune blonik oma („Bienalak“, 1890) / *Äsagol seimna, das äsümom-la ad plögun braunik okik* („Bienalak“, degyel 1950^{id}).

Too gebäd neverätik at äpubon anna in diatek nulik, sevabo:

V:45:2023

- **äleigädom** *kluo oki Gode* (gospul ma ,Ioannes': V, 18).
- **peleigükölo Sone Goda** (hebreyanes: VII, 3).

B. Datif neseکیدik (latino: ,dativus absolutus'). In vönaslavs äkomädon stukot ko datif sonemiko neseکیدik. Stukot at äbinädon me partisip in datif e subsat u pönop in deklinafom ot. Stukot at in Rusänapük nuik baiädon ko sekidaset tima u koda. Samo dil primik pö kedet foldegmälid kapita degte⁸ lid gospula ma ,Matthaeus' („Du nog äspikom lü menamödots, ekö! mot e blods ästanons plödo...") petraduton ini vönaglugaslav ön mod sümik: **Nog ome spiköle lü menamödots, ekö! mot e blods ästanons plödo...*

8. Kludods.

Datif Volapükik no binon ut natapüka seimik, labon patöfis lönik. Jü bevob fa ,de Jong' Volapüka datif pägebön suvikumo, ka nu, ma sam nata⁸ pükas valasotik, ab nu Volapükans mutons lobedön prinsipi, keli ,Schleyer' it balidnaedo älofädom: te värb ut, kel kanon reigülön me kusatif (sevabo värb loveädik), i kanon reigülön zuiko me datif. Värbs somik sis dabük ela „Gramat Volapüka" fa el de Jong panemons Volapüko värbs loveädik demodik (bi subsat stadon in datif pö värbs somik as demod). Subsat in datif i kanon fümetön as läod subsati votik. Datif nen värb i pagebon pö vo⁸ käd fomü set defik. Pö jenets patik (tiäd, dediet) subsat in datif igo kanon binön vöd cifik u balik seta. Datif in Volapük labon sinifis difik: *getana, beladetäba, frutidana, dämükäba, fonäta, dunölana* (pö värb komplitik). Ye sinifs votik (sufölana, lüoda) defons in Volapük.

Yeged at jonülön, das Volapükans, lomapüks kelanas labons datifi, mutons steifön ad vitön fluni natapükas ut, kelis sevons, bi — ma vöds ela de Jong — binosös zesüdik pro gebäd verätik gramatafomas ad „tikön Vo⁸ lapüko" (revidan gretik Volapüka äpenom dö värba⁸foms, das „töbo plakoy fikulis pö gebäd fomas at, üf te sevoy-la ad tikön Volapüko"). Kludo lär⁸ nob⁸sös ad tikön Volapüko!

FIN.

Dils büik yege⁸da at penotükons medü „Vög Volapüka", sevabo: **2021**, nüm: 1, pads: 10–12, n. 2, pads: 14–16, n. 3, pads: 22–24, n. 4, pads: 36, 37, n. 5, pad: 45, n. 6, pads: 52, 53, n. 7, pads: 69–71, n. 11, pads: 108–110, n. 12, pads: 118, 119; **2022**, nüm: 2, pads: 13–15, n. 4, pads: 29–33, 36, n. 5, pads: 41, 44, n. 6, pads: 51, 52, n. 8, pads: 70, 71; **2023**, nüm: 3, pads: 23, 24, n. 4, pads: 35, 38, 39.

DOG ELAS ,BASKERVILLES’.

Fa hiel ,Arthur Conan Doyle’. Petradutöl fa hiel ,Oleg Temerov’.

Tradutod papübon bai koräkots pülik fa hiel ,Daniil Morozov’.

KAPIT MÄLID. ,BASKERVILLE HALL’.

Hisiör: ,Henry Baskerville’ < e dokan: ,Mortimer’ < äblümoms tü del piʒonidüköl, ed obs, äsä pirajanos, imoʒ tevobs lü ,Devonshire’. Söl: ,Sherlock Holmes’ äkeʒvabom ko ob lü stajon ed igevom obe бүдүлiс e lejonodi okikis leʒ ditikis lätikis.

„No okodedob tikäli olik ad бүмiсöд me mobs teorodas u miniludas obikas, o ,Watson!” äsagom; „Te vilob, das onunodolös lü ob dö jenöfots mögiküno veitöfiko, ed omoʒ gevolös obe mögi ad teoram.”

„Jenöfots liosotik-li?” äsäkob.

„Valikos, kel jinon alseimo tefön säkädi, pato kosädi vü ,Baskerville’ yunik e nilädans omik u patis nulik seimik tefü deadam siöra: ,Charles’. Dү delс lätik ömik ob it iseiviʒ dob ömikosi, ab sek liedo äblebon noik. Din te bal bo jinon fүmön: das söl: ,James Desmond’: geran balidkömöl< biʒ nom stimaban tibäldik labү natäl mu flenöfik, kludo pöjut at no dalon pakodidön otane. Voiko cedob, das go kanobs nedemön otani pö vätäls obsik. So mens posblibons, kels jenöfiko ozүons siöri: ,Henry Baskerville’ < pö maräd.”

„Mögos-li ad säbejäfön matanapäri et elas ,Barrymore’ muʒbalido?”

„Lenö! No äkanolöv pölön vemikumo. Üf etans binons nedöbiks, fe atos obinonöv negid vemik, ab үf binons koʒ dans, täno leno ospelobsöv ad säklänedön roulis onas. Nö! nö! odakipobsös etanis pö lised obsik miniludükäbas. Zuo jevodaʒdünan komon us pö ,Hall’, үf memob verätiko. I farʒ mans tel pö maralän. I flen obsik: dokan ,Mortimer’, hikeli cedob go ritiki, ä jimatan omik, dö jikel sevobs nosi. I natiʒ vestigan et nemү ,Stapleton’ e sör omik, jikel, äsä sagoy,

V:47:2023

binof lädül keinik. I söl: ‚Frankland’ se ‚Lafter Hall’, hikel i binom faktor nesevädik, sa nilädans votiks bal u tels. Atans fomons menagrupi, keli mutol küpedön vemo staböfiko.”

„Olejäfikob me töbids obik mögiküno valiks.”

„Labol-la vafi, vo-li?”

„Si! ädesinob ad kesumön oni zuo.”

„Go fümö! Okipolös rövulapistuli olik lä ol delo e neito, e neai oläsükolös prüdi olik!”

Flens obsik ya ikoedoms resärfön seadöpis pö levab kla-da balid ed ästebedoms obis su pärun.

„Nö! labobs nunis nonasotik,” dokan: ‚Mortimer’ < äbe-gesagom säkis flena obik. „Süadob te dö utos, das no pälü-kobs dü dels lätik tel. Neai äplödikobs nes lai-zilogedön, e nek äkanon sädrefidön küpäli obsik.”

„Ai ästadols-la kobo, vo-li?”

„Plä äposzedel. Kösömo, ven lükömob ini zif, retidob deli bal lölik pro muad, kludo älifädob oni pö mused löpatidöpa kötetavanas.”

„Zuo ätävob lü legad ad dalogön menamödoti,” ‚Baskerville’ äsagom.

„Ab leno älabobs tupis alseimik.”

„Too atos äbinon nentikälik,” ‚Holmes’ äsagom, lemufü-kölo kapi okik e logotölo vemo glumiko. „Begob ole, o siör: ‚Henry’! das no ozigololös soaliko! Ibä voto mifät seimik ureifon oli. Egetol-li juki votik olik?”

„Nö! o siör! emoikon fifümiko.”

„Jö! Atos binon vemo nitedik. Soö! adyö!” äläükom, ven tren äprimon ad sleafön dese pärun. „Demolös! o siör: ‚Henry’! bali fraseodas se konäd bisarik vönik et, keli do-kan: ‚Mortimer’ äreidom obes, ed ovitolöd marädi ünü düps dagik somik, ven näms diabik nämädons.”

Fövot ofovon.



V:48:2023

GRAMATABRUL.

KIÖPO TUVÖY-LI DEFOMOTIS DE EL UT?

Bü muls anik nogna edupadob tidabuki fa el André Cherpillod tiädü ‚Vola-puko en dek lecionoj’ (= ‚Volapük medü lärnods deg” speranto) ed eküpob notodotis bisarik tel: „utö kö” ed „utü kü”. To legud lebuka lölik at lölots et vödas leno binons verätiks, bi ninädons fomis nedabinik: *utö ed *utü, kels jinons binön seks koboyüma nomis gramata enefolöla (sevabo: ut + [t]ö, ut + [t]ü; els =ö, =ü binons poyümot tefädo lintelekas e präpodas, klu neföro päge= bons ön mod somik).

Tefü jenet balid vödabuk calöfik gevon sotüli votik ä verätiki: „uto kö”. In diatek nulik ed el „Gramat Volapüka” i komädon stukot: „utöpo, kö” (labü finot: =öp=ö binädöl tefädo me poyümot topa ed ut ladvärba). Pönops jonik votik no labons defomotis sümik, ab in vödabuk calöfik fom: attopao (= de top at) < komädon dis tiäd: **fräd**. Alo no nedoy-la datikön nulavödi alseimik, bi lei= gätods brefik e benotoniks tels: uto, utöpo < ya dabinons.

Tefü jenet telid komandabos, das geboyös stukoti: ün (dü) tim (at, et, ot, ut), kü... (sams: timül ot, kü; yels ut, kü). Ma vödem dasamik ed igo vödabuk cifik ladvärb patik timik „büjonik” no dabinon in Volapük. Ye daloy defomön vödis sümik de pönops jonik ön mods tel, sevabo: 1=ido ko lim finik: =timo (attimo, ettimo, ottimo), 2=ido yufü poyümot: =üp (otüpo ü leigüpo). Mod telid no binon suvöfik e jinon tefön te pönopi: ot. Kikodo-li? Büocedob, das dabin subsata: tüp < ko sinif timik binon-la neletian bosik. Sekü atos kanoy-la detei= lön de vöds somik stamädi ma mods tel, sevabo: ot=üpo (= leigüpo), o=tüp=ö (= ünü tüp balidfovik). Ladvärbs votik (attimo, ettimo, ...) no kodons telplänovi somik. Ba id el *uttimo kanon palecedön nulavöd mögik (leigüpo el *utüpo i tefon-la tüpi fütürik telid).

Alo nulavöds alseimik bida at binonsöv nezesüdiks — mu pato in tidabuks. Tefü atos vilob saitön vödis goldöfik se pened de ‚Hermann Philipps’, kels ka= nons jäfidön as konsäls frutik pro lautans tidamedömas:

„Ai sötöyöd vätälön utosi, kelos zesüdon pro lärnans nulik Volapüka! Atos sinifon, das mögiküno no daloy gebön vödis, kels neföro pägebons fa Vola= pükans voik e kels no komädons in vödabuks konfidovik. Foms e vöds, kels te dabinons in fomälam lautana, ab no in vödem mastanas ettimik Volapüka, no sötönsös komädön in tidabuk pro primans. Lärnans sötönsös lärnön te vödis, kels dido pagebons in Volapük pla vöds nuliko pedatuvöls fa lautan tida= buka.” ■